

蓬廬文鈔

蓬廬文鈔卷七目錄

傳 墓誌

朱烈婦傳

擬祝母節孝吳太孺人志略

文學祝禹範暨配查烈女傳

文學陸牧薦暨配周孺人合傳

故黔陽知縣元隴公家傳

族母錢孺人家傳

族節母家傳

公純先生家傳

蔚州張氏女子傳

清故諸暨縣學教諭董海嶠先生傳

周母沈碩人傳

徐母呂太孺人傳

史孺人傳

中丞李得陽妻鄭宜人小傳

誥授奉直大夫雲南白鹽井鹽課提舉司提舉晉贈朝議大夫郎公墓誌銘代

蓬廬文鈔卷七

海寧周廣業耕厓著

傳墓誌

朱烈婦傳

烈婦姓姚氏農家女年二十一繼室桃源里朱崧崧老且貧屠沽爲活烈婦安之四年而崧病死烈婦腐萱自給舊嘗負兄錢因過責償不得輒走持旋磨牀去不得腐索逋者往往幸其嫁烈婦悲憤甚因提三歲孤檢室所有呼娣屬曰幸撫若長延宗祀我固不可獨生也娣爲寬譬不應乃拉諸娣陰防護之數日不即死人遂疑其僞或竊笑之旣忽晨起治飯一盂菜一器陳崧靈次哭極哀退吞瀟而死時雍正十年月日也於是宗族鄰里始嘖嘖稱嘆走白之縣事寢不果

旌其再從兄世楠記其略越二十有六年戊寅宗人請載邑志余覽其事竊有感焉國風之放蕩無禮者莫若鄭衛而雞鳴之賢柏舟之節獨皎然不污于其間雞鳴之女或幾于後世白頭之吟矣而共姜已不能釋憾于母春秋之世魯號秉禮而姜氏之姦史猶罪及桓莊是故人非志之難守志之難吾寧節烈風最盛朱又巨族

名姬貞媛炳炳志乘不可與此同年語然烈婦生未知詩書而其夫爲賤傭逐錐刀設使以貧乏故反唇辭語既寡無帶無裳不安其室豈必世俗所絕無即人亦豈遽得以禮裁之而卒食貧既瘁就義從容與古昔所載記如出一轍不亦難哉抑余又思之與子偕老之死靡他二婦人者各行其素要之易地皆然未有生偕老而死則有他者亦未有死靡他而生則可不偕老者嗚呼烈婦不幸而夫遽死夫不遽死使眴勉相厥夫子以繼其後以睦其娣如余知其必爲梁妻爲潘母爲鍾郝而已也嗚呼惜哉雖然烈婦以烈死死猶生也夫何憾

擬祝母節孝吳太孺人志略

節母吳氏海鹽正肅公後裔庠生曰夔女妣許氏通女誠年二十有一適庠生祝鏤六年夫卒欲從死念二老一孤在死則無所依乃強自活以事父母者事舅姑家貧恃女紅連遭歲祲米騰貴氏百計營甘旨侍堂上勸殮而已與子常竟日不粒食不令舅姑知也姑患痰咳每發委頓一夜七八起抑搔扶掖無倦容疾止乃已執姑喪哀痛廢食飲不欲傷老翁意晨起飲泣靈次不成聲翁復遭危疾醫皆束手氏中夜叩天哀籲願減已算以益翁如是七十日翁瞽眩中見神人撫之遂不日愈然氏竟以哀勞積病死死之日瞻視呼天以不得終養爲恨囑子媳毋徒哭泣傷祖父心聞者流涕訓子嚴整有法淦四歲日課二十字每課必首舉人字詔之曰人須是頂天立地六歲授小學責以聖賢之道有過必令至翁前跪而受責淦登丙辰 恩科鄉薦自署人齋誌

母訓也凡守節一十七年雍正六年奉 旨旌其門

文學祝禹範暨配查烈女傳

庚辰莫春余客居江陰有入夢者垢面羸體前余淚漣漣下熟視之則我外弟祝君禹範也因大驚累日忽忽若有失踰月旋里謁吾母問起居外旁及婚友母乃涕泣爲言禹範事嗚呼君竟與其配皆死矣君爲我伯姑母季子幼穎異長老寵愛之貧不能負笈間問字於族戚之賢者輒書然解旣遭母喪哭盡哀益自力學與同社角藝屢冠其曹族兄祝人齋先生器之招之讀書文譽日以起顧念吾姑丈鰥且老出爲童子師取脩脯以養天性純至年踰弱冠依依如嬰兒姑丈顧而色喜嘗笑語廣兄弟曰此子神韵殆似外氏然謝石階庭正復不可少此年二十四補博士弟子員時君尙未婚也同里查翁高瞻以女字之君授徒之暇攻舉業尤專所作制義詩帖悉彬彬雅可觀俄而染痘數日大漸醫者謂非進優飭許不能起貧無所出查烈女聞之焚香籲天默禱旣乃大慟曰夫子其死矣我當於泉臺相見耳遽絕粒中夜投繯而絕自是君病日篤三月十有三日卒蓋去烈女之死十有五日云烈女故望族父母慎擇壻旣得君同里相賀以爲得呂子衡翁亦喜君旣病或就謀藥物焉翁諾而未予烈女憂甚將檢篋所有以遺君不得便爲知者所竊笑憂憤益甚度不能救又不欲坐視君死而以身先之嗚呼柏茂而松悅芝焚而薰隕不其然哉憶歲新正見君子朱蒿菴姑丈家因偕至舍談甚

賦詩閱數晨夕而後返上元之夜伯子存齋家宴席設芹酒闌月白清風徐引伯子謂不可虛此良夜以香芹碧澗羹分賦君得羹字落句別具悽惋余曰我輩落落自命合並亦易事何作此蕭索語君悟焚其稿嗚呼豈謂竟成永訣耶竟成凶懺耶易稱困石據藜入宮不見夫子繫以名辱身危死期將至以君生平文行考之萬不應有是兆也余以衣食奔走未遑據牀一慟獨念吾姑丈星星白髮外兄延年四十無子總帷蕭然形影相弔余獨何心能不痛哉然君猶向余而鳴哀君之志甚悲君之事足傳矣君名天錫海寧龍山里人禹範其字卒時年二十有五烈女長君一歲

論曰禹範而死命也烈女使稍紓其死以待禹範之死安知禹範之必死而竟死亦命歟非也女而不婦見譏春秋夫女之與婦固有間矣烈女非有死其夫之心而不能以生貸夫之死則惟有死且速死庶可以明己志瞑夫目耳死生亦大矣雖未免賢智之過然其所以報禹範者則奢宜合葬而表其墓

相傳禹範病時外姑遣人贈之果餌烈女陰有所助爲女伴所笑後外舅復將以優饋之其子不欲宣言禹範病已彌留饋侵何爲烈女聞之始絕粒引決踰日笑者暴亡禹範亦屢見烈女在其側自述死狀及誓同穴意旣沒查氏合門病狂祝氏聞之設烈女主與禹範同龕乃已近新倉里秀士胡學振歿所聘蔣氏女偶出恍惚有見神魂失據者累日後遂作新郎語謂欲偕往女悉唯唯舉家祈懇繼以嫚罵輒復響應聲息稱謂迴異平

時女竟病死余以其事可與禹範相証附記於此以見情之所鍾幽明無二致焉

文學陸牧薦暨配周儒人合傳

陸君牧薦諱堯臣余姊壻也自君以上三世爲茂才有聲考妣相繼歿君及其弟堯佐堯咨俱幼從伯某翁爲經紀其家堯咨後焉君好讀書以族兄體原翁爲師自束髮迄弱冠不聞戶以外事學旣成從伯爲析產則視舊額十耗六七輿論騰沸君處之泊如也年二十四補郡弟子員制義清矯刻至胎息西江同社角藝常冠其曹輩引應鄉闈不得志家居教授自給餘暇則手理桑麻瓜菓之屬姊嘗勸止之慨然曰我以習勞也昔陶公尙運甓出入况吾輩乎待物寬厚里黨無賢愚咸愛重之然性特端介是非不稍假有不愜雖求一嘖笑不可得與余兄弟稱最相得又所居接濟衡宇相望往還爲最密然亦未嘗見其有謔言慢容也居恒呐呐與質論古今人物文字輒應答如流一時莫能窺其淺深焉君素強健己卯後屢爲頭風所苦發即終日委頓辛巳冬余姊病卒君益愀然不樂嘗作悼亡詩自序其首歷道幼年孤露及中歲失耦之境哀苦不堪竟讀未幾遭腹疾遷延累月壬午秋族人以應舉赴武林君方病困堅欲偕往同舍生入闈猶以己不獲與痛哭送之及歸自度不能起謂其兩弟曰我與若少遭凶閔艱苦備嘗方欲努力前途共扶衰運今年甫踰壯而竟若此亦復何言我死可呼我爲半人蓋自以爲僅半世人耳以其子翰屬仲弟使善撫教之斂則稱家從薄八月二十有四

日卒距生雍正庚戌十二月二十二日得年三十有三姊長君二歲先孝廉公仲女也兒時多病喜如素先孝廉公之歿姊年十三每余負笈歸輒能以纘承先志相勗佐母孀人紡績易薪米雖盛暑嚴寒未嘗輟歲丁卯忽患瘰癧多方治之時瘰時作既殯于陸內外上下皆稱曰賢丁丑春以產致癰自分必死會余客淮上歸姊亦來寧則降肸其腹矣觸暑走數十里爲求醫凡數閱月而痊然自是神氣益衰薄性喜治蠶徵稅賓祭取給于此爲多死之日檢篋得生絹十數丈則辛巳長夏手治絲所成也是冬遂患痢癰復作藥餌不能效時季弟庸玉客西江初擬歲底歸覲姊懸望倍切臨歿猶以不得一見爲恨又呼張氏姊不置蓋其孝友醇摯屬續不忘如此姊生戊申五月十二日卒辛巳十二月十八日得年三十有四子一翰女一俱幼

論曰陸君幼而孤壯而喪耦繼之以死命何厄也至於歆歔易簀自號半人慘益甚已抑余聞其疾篤時呼仲弟堯佐詔之曰予季出嗣從伯然同胞也不可使貧無所賴予與爾產雖薄其仍析爲三以其一畀之佐亦唯唯及卒終踐其言嗚呼此其孝友之性爲近世僅有者有一于此竟使夭折天耶人耶命耶

故黔陽知縣元隴公家傳

公諱文燁字穆仲號元隴高祖諱書明聘君澹齋公第四子也分居硤石故公爲硤石人幼失父母居喪以孝聞年十四補諸生沉勇有大志順治三年丙戌浙江開科由恩貢登鄉薦丁亥成進士己丑謁選得湖廣辰州

府黔陽縣今屬湖南沅州府者也挈家赴任黔故梁龍標地與瀘沅五溪隣民苗雜處號巖險明末爲闖賊所竄王師平楚瘡痍未復值靖州陳友龍叛肆行劫掠公下車僅一空城耳聚殘黎數百家繕葺固守時方盛暑公步行赤日中巡視城堞勞守陴者與民同食宿士咸感奮誓死不從賊而友龍勢益橫初友龍以僞總兵降于我未幾悉衆數萬反圍靖州城急會提學僉事彭而述將巡撫貴州率兵三千人駐靖與決戰城西門外南山下始合不利副將賀進才戰死城中鼓譟閉門欲與友龍合而述退保寶慶定南王遣副將熊嘉夢以兵三千益之相持紫陽河上歲餘而述嘗分守永州道永陷於賊坐免去賊益猖獗無忌分掠郡邑獨公所治秋毫不能犯賊至城下矢礮如雨皆走遁間出奇兵擊其怠馘其數十人賊相戒曰周公書生用兵神速乃爾勿妄干也三閱月餉絕七月某日公薄暮率輕騎赴會同催辦兵糧猝遇賊洪江洪江一名雄溪五溪之一也被圍數匝我兵不盈百公奮槩率所部四面衝突槩絕手格殺數人友龍服公義勇輒麾已卒免之平明友龍兵益大合見執厚禮誘降公瞋目叱之館於別室復使人勸之怒罵不已遂遇害訃至署妻施氏自經死妾王氏投井死左右賓客兵壯死者凡八十餘人縣遂陷迨康熙三十年黔人士向文煥等始上其事於縣令金壇于公棟如爲請於當事其辭略曰殉節捐軀雖人臣服官之常分而成仁取義實朝廷褒錄所必加伏查故令某射策於定鼎之日筮仕於恢復之初當遵渚鴻飛著勤勞於撫字值負嵎虎視矢大義以忘身陳友龍

起疊伏戎勢若子奇之荼毒周知縣餐刃不變甘同許遠之忠貞萇宏碧血三年心猶戀主望帝哀啼五夜魂未還鄉百口仳離全家陷歿趙武之孤何在杞梁之骨未收雖當事之表彰闕焉未舉而斯民之愛戴久而彌新考諸縣志既有紀載之文實諸老成復非影響之說伏乞俯察輿情轉請 題旌用以表孤忠而垂名教有裨于世道綱常者良不淺也事竟寢然黔人益思之不置乾隆十五年公從孫廷元請於本縣轉詳咨楚未覆廷元卒不果二十一年黔令柳令復以祀名宦及載省志請於楚撫咨查到浙嗣孫光錦以事上大憲據覆而已又不見報子姓氏微故 旌卹猶有待也公萬歷年生順治六年七月日卒年四十有五女一適海鹽庠生徐豫貞嗣子孺兄子也邑庠生工詩生光輪無後嗣廷元之子朝鼎又歸宗歿絕今復以光錦繼孺光輪有從叔表爲陝西臨潼丞往依焉因乞殉節記於粵東黃天祐時爲三水令云

廣業案康熙間黃公天祐

字次臣

所作殉節記凡二千餘言論述頗詳先君子得其稿藏之至乾隆丙子當道

接准楚咨下縣時公已無後人族衆更立光錦上公事狀並抄呈此記縣爲據詳雖見抑于當道而事蹟獲傳賴此記也頃因彙錄卷宗以俟後舉覺記中尚有未盡合者如云黔有羅公山周五百里四面險絕絕頂一池廣千頃友龍盤踞其中屢出圍城杭堇浦太史作公傳據之

見道古堂集

考黔陽縣志災異志載順治四年

丁亥十一月 王師取黔五年五月靖州降鎮陳友龍叛知縣周文燦被執死之是後亂兵馬盡王進才據

羅翁山袁宗道張光萃據泝水出掠遠近城野爲墟十五年五月王師取滇再入版圖則是踞羅翁者馬王二賊也友龍旣陷靖州豈專恃羅翁之險盤踞其中耶今爲節去記又云一日西出略地卒遇賊金橋被圍誘降不從遇害無催餉及被執之事據湖南巡撫咨文內開某赴會同催辦兵糧突遇賊于洪江又開黔陽縣志云陳友龍叛公被執於洪江死之又沅州府知府唐珠看云某赴洪江地方催辦兵糧被執誘降不從遇害全家陷沒湖南藩司看云某被執友龍厚禮誘降不屈館於別室復使人勸之終不屈遂遇害又陳宏謀湖南通志忠烈傳周某浙江進士順治六年黔陽令甫三月值靖州降鎮陳友龍叛被執於洪江死之雖所載詳略不同其言見執無異觀康熙三十年于公詳文以許遠爲比正昌黎所云與巡死先後異耳此蓋由光輪乞記時諱言被執而督餉則聞之未詳也廣業以事關忠烈必宜核實因參考衆文咨訪遺獻別擬此傳入之家乘先是光輪幕遊有志請旌未逮將黃記及逃奔詩數則彙刻一冊呈秦中當事求其咨楚不報適有不宗海鹽人周光錯者得之後犯事抵嘉興府案冒稱忠裔得免罪旣聞光錦客死無子而吾家居硤石者五重偉光及元隴三公先後皆合門殉難他或徙或絕丁移少光錯遂生覬覦赴海寧呈請旌卹詐稱公次房嗣孫應得蔭卹申憲批飭核查族人始知之時廷元遷居蘇州推序應以其子繼光輪方咨楚俟覆而廷元及子相繼死故未及題奏乃其事實發于光錯可異也至光錦之請本起于楚撫咨查竟

格於本省當事嗟乎公不難以勤事死而後人謀表章者合楚浙凡四舉而卒不果何其難也然 聖朝褒

卹隆恩不遺微末同時辰州知府大興王任杞由崇正壬午舉人蒞辰亦被執不屈死闔門四十口皆縊

恩予卹蔭事載畿輔通志忠烈如公經百餘年忠魂耿耿豈終湮晦者哉戊寅秋九月 廣業識

族母錢孺人家傳

母姓錢氏樵李之名族考文學諱俊明妣李氏晚年得母未字人而歿文學默之公 廣三從叔祖也爲嘉興弟子員有聲與同舍生錢本治善聞其女弟賢委禽焉母年二十一歸公爲繼室逮事孀姑曹太孺人一年侍疾執喪以孝聞年二十五默之公歿一孤同日殤母號慟仆地絕食誓死娣姒勸之不應先節孝曾王母聞之扶杖而往諭曰屍柩未葬嗣未立汝死誰藏大事母遽含淚起家故貧公死所有悉償他人屋一椽以草覆之不蔽雨雪母日夜紡績其中嚴冬寒冱十指瘃裂血淋漓絡緯間未嘗稍輟及買得錢必選銅郭完厚者投一敝篋內以餘易薪米鹽菜積十餘年拮据之買舍東三角村地葬舅姑夫及元配陸焉或勸之火葬費可減母曰薄葬非禮也忍使骸骨燔灼乎卒竭蹶封土爲墳祭以時雖禴必誠潔其費蓋豫減己食而得之而公弟應昌贅于城亦貧乏早世無子是時母以熒熒未亡孤撐門戶從子中賢者度難乞爲後即後日量米不過數合更具一人食母子且旦暮死死則先人血食必且立斬勢出兩窮此殆鬚眉所一刻難處者而母且飲恨苦守二

十六年以無替宗祀斯亦難矣性耿介奇窘恥乞貸丙子歲祲斗米三百錢母炊烟久絕里中富民輸粟平糶計貧者戶口給粟票合取粟或憐持票勸之糶母曰我守身垂老豈肯以一飯敗之且玷死者我何生爲堅却之日啖煨苳一鐘及瓜菜累月鄰居未嘗見其有厭色嗚呼此更可見母矣今年蓋五十有一歲默之公諱應期雍正壬子入鄉闈得疾歸而歿云

族節母家傳

節孝曾王妣朱太君有娣婦姓楊氏三從叔曾祖江左公室也年二十三而寡遺孤二家赤貧常數日不舉火或磨麥麩作餅雜摘野菜取一飽侑之以水母高憐之欲奪其志不可恚而去逾月則精飯治羹羹手遺之冀女食之甘因從容勸勉俾嫁得善所母以分飼孤已啖餅無厭色高笑曰何自苦乃爾母遽作色曰毋多言死即死耳况周氏世清白何可自我敗之因舉懷中孤向高曰若非爾壻嫡血乎將置若何地言訖淚如雨下高亦相持大慟自是無嫁意然卒無所得食先府君倡議助之米同祖以下人占一月不足則就兄嫂食後一孤殤母勤織作撫其幼稍給饘粥即謝月米孤九歲命隨舅氏服賈爲娶婦有孫今年五十有九歲江左公生母胡生三子俱歿母奉養十餘年卒之日含斂成禮擇地瘞胡及夫骨焉以母家事佛終身茹素好持咒禮懺歲時潔蔬果享舅姑及夫舅 本生高王父貞靖公也曾王妣其降服冢婦而母于介婦中爲季

公純先生家傳

族伯公純翁蓋古所稱篤行士也垂暮無子常忽忽不樂乃自列其行狀使廣撮作傳按翁名化麒考文臣公生五子翁行三甫晬以痘故耳目偏廢及長讀書刻苦質不過中人所得常加同舍生一等尤矜尚名節年十六應試郡城同寓者富家子酒食相徵遂嘗爲西湖長夜之遊寓主利諸君資斧以翁在不得間乃密遣女入房煽惑翁翁初不知其爲詐也以理斥之女慙而退後塾師有戀鄰婦者翁切諫數四不聽病咯血死論者謂藍青之間而惜師之不納言焉居常木訥粥粥若無所能而處事每切中條理聞戚友有過舉反覆陳得失雖用是取怒不悔也甥張某者以遊戲傾家貲更與叔謀傾帑爲化居翁決其必敗力沮勿聽因書城門失火殃及池魚楚國亡猿禍延林木于壁甥啣之然其家卒破蓋其誠懇切直言皆有驗類如此翁之初授室也考命與伯仲析箸旣而考復舉二子家政付翁掌酬應煩劇退攻詩文甚猛遂發危疾不得已棄去舉業其治家也內外井井閨庭雍懌十數年囊無私財先後治親喪以厚幼弟早沒資給遺孀又弟倬雲喪妻翁憐愛其二子長皆不才與其父謀煨祖若考棺翁執不可破己產以葬家故有美婢或以無子勸翁置之側室翁曰是重吾過也禮遣之年將艾鰥居誓不復娶待女適人即以產宅付弟姪而已出爲童子師所獲脩脯與壻姪共之故老而益貧著詩甚多有佳句旁通京管之學嘗自言歲行在某常有咎翁蓋生康熙戊辰今年七十有四云

蔚州張氏女子傳

蔚州女子張氏生寒門寄養他氏及長有容態父母爲擇嫁未得會平城大夫選女伎將有所進令所親至蔚求之罕當意者或不願入樂部媒官某黠者也謀以張女應旣陰與父母約乃語所親曰好女不難但以實告即十九敗官人年少美丰姿但云納小妻事必諧諧後任所處耳所親許諾因偕過其家少頃父母引女出素面淡粧輕盈步履見客逡巡避去所親目送之大喜媒遽揚言曰官人新失耦欲得賢媛作外婦他日當令貴甥光門戶矣父母亦大喜女聞更私喜甚已納聘錢定婚約欣然就道時女年二九所親纔弱冠蔚去平城二百餘里二人者行同輿宿同室食同案如是數晨夕僕隸無敢泄媒官事者女安之不疑旣謁大夫曲眉紅頰益明艷動人大夫亦喜令遍拜賓客咸曰不減李法主雪兒也女就舍有老姥前道勞苦且賀曰主君方治嚴具不數日置汝錦繡叢矣女懼然具訊得始末神色陡變淚涓涓下晚勉進一殮詰朝病矣經旬轉劇姥視其枕檀被池皆淚痕也復慰之曰彼大富貴饜梁肉曳羅綺不待言以娃才色一旦蒙恩寵號八子是出淤泥而登霄漢也復何所戀而戚戚自戕若此女嗚咽蒙臥臨死謂姥曰妾不自量冀附君子爲人給辱義不得生噫嘻命夫言訖而絕大夫憐而葬諸郭外時甲辰春月也友人寄巢子作詩弔之復爲余道其事嗟乎俗之儉也曳裾揚袂鬚眉之士有若鶩焉一窮巷弱女子皦皦自守不肯苟事貴人以變其志而要之以死雖古列女何

以加茲氓之詩曰女也不爽士貳其行士之不如女可嘆也

丁未春寄巢重遊平城歸爲余言墓在縣城東半里許義塚左側豎碑曰蔚州張氏女子之墓旁記年月日
縣幕客山陰朱君麟趾實經理其事並識之

清故諸暨縣學教諭董海嶠先生傳

海嶠董先生卒之三十七年順孫姓奉其先人所作行述及家譜語廣業曰大父績學砥行歷夷險如一日子所知也恐久而湮沒敢以傳請廣業辭非其人不獲命乃撫序其行事使補家乘之闕董之先世家潮東元季儒者曰仲真始居海寧之錢山六傳至念齋君諱明吉萬曆辛卯舉人先生高祖也曾祖補齋君緒緒祖思東君世昌考遠山君昇皆邑文學遠山君七子先生其長諱上容字侶音號海嶠幼育外家王氏頭角嶄然長老咸器之讀書徹晝夜顧不甚喜時藝思東君戒之曰制藝不僅爲科舉設也將使祖述孔孟推闡程朱本之經籍以發其光參之史傳以盡其變學爲聖賢基此矣奈何忽之先生恍然有省因專攻焉贅海鹽之倪冒倪姓遊鹽庠遷居之闌試一失利發憤下帷以仲舒不窺園圃爲漢大儒遂自號不園數年詣益進康熙辛卯舉於鄉長洲徐公亮直極賞其會闌卷以力薦見抑主司深惜之後遇試輒屬意先生先生輒引避旣六赴春官不得第淡於進取友人爲實踐之學者貽書招之遂南還與陳先生祖陶沈君允懷往返茗雪間雍正丁未秉鐸